

國學書

清代傳記叢書



明文書局印行

清代傳記叢刊・綜錄類③
周駿富輯

碑傳集

(七)

卷一〇七至
卷一二二

(清)錢儀吉纂錄



明文書局印行

碑傳集卷一百七目錄

乾隆朝守令下之上

福建將樂縣知縣王先生元啟墓誌銘

翁方綱

又書王宋賢事

張士元

勅授文林郎浙江德清縣知縣張君洲墓誌銘

薛寧延

山西交城縣知縣莊君繩祖別傳

趙懷玉

鶴崖先生牟貞相墓誌銘

王伊

桐鄉邑侯呂君爾禧傳

馮浩

臨安府知府張君王樹墓誌銘

王燕

周太守際清小傳

王利

麗江府中甸同知梅公士仁行述

溫汝適
節錄

山西甯武縣知縣彭君禮墓誌銘

王秉

雲南府通判陳君聖修墓誌銘

焦備
代阮元

薊州知州王君若常墓表

秦瀛

勅封文林郎原任安徽宿松縣知縣黃君堂墓誌銘

余廷梁

南池彭司馬

名失墓誌銘

錢澧

周君士孝墓誌銘

杜蘇 和傳一百七

秀水縣知縣前任海甯州知州戰君效曾傳略

馮浩

廣西潯州府知府湯府君大賓墓誌銘

趙懷玉

故江甯縣知縣前翰林院庶吉士袁君枚傳

孫星衍

偃師縣知縣王君復行實輯略

武億

安肅縣知縣沈君可培傳略

馮浩

碑傳集卷一百七

嘉興錢儀吉纂錄

乾隆朝守令下之上

福建將樂縣知縣王先生元啟墓誌銘

翁方綱

先生諱元啟字朱賢號惺齋先世自杭遷嘉興曾祖國泰祖承榮父昌業世有隱德先生幼卽有志聖賢之學不爲時俗文字舉乾隆甲子浙江鄉試辛未成進士署福建將樂縣知縣三月而罷然其釐訟獄禁賭博設十家牌平鹽價立排糶之法禁質庫重利濬溝渠修橋梁道路諸實政悉殫心力爲之邑人以爲抵他令數十年之功旣以誣被吏議復至其邑民扶老攜幼饋粥米効汲爨及鄰境之民皆歡迎如慈母先生雖於經濟未竟其志而教人之用尤著前後歷掌講席於延平道南書院者再又於仙遊之金石邵武之樵川順昌之華陽蓋在福建最久也河南則衛輝之崇本山東則濟南之樂源蒿庵曹州之重華於其鄉則鎮海之鯤池三十年間十主書院之任所成就之士以學行文藝科目著顯者數千百人先生爲學以宋五子爲宗說經尤精於易而爲文一本韓子撰讀韓記疑十卷周易四書講義史記漢書韓非子孫可之歐

曾王文集及錢文子補漢兵志諸書校正評註凡若干卷惺齋論文句
股九章論祇平居士文集恭壽堂家訓若干卷凡嗜學多文之士知考
訂者輒多厭薄宋儒以自喜今日學者之通患也先生博極羣書勤考
證工文詞而篤守程朱之旨終身勿貳誨人勿懈若先生者可謂真儒
矣既病革猶補註周易下經及校勘韓集易至既濟止韓集則易簣前
一日猶命子尙繩改定順宗實錄記疑條中二字蓋其貫天人古今之
精力畢世以之先生生於康熙五十三年七月十一日卒於乾隆五十
一年七月一日年七十有三娶沈氏例封孺人子男三天石早卒尙珏
附監生四庫全書謄錄廣西西林縣知縣尙繩增廣生女一適貴州銅
仁縣沈心醇孫男二克生國子生克新孫女一適甲寅舉人蔣殿曾孫
五曾孫女五銘曰

孰能博綜漢唐而篤執程朱淵哉若人不見是圖學則伯厚東發教則
鹿洞蘇湖蓋超出乎籍湜紹述閒而獨爲韓之徒

又書王宋賢事

張士元

王宋賢名元啟浙江嘉興人以進士知福建將樂縣乾隆某年十一月
至明年三月去將樂山縣民俗浮險競利而輕生每歲終民間強索所

負及田主追贖遠年棄地往往鬪毆至死傷成獄又多好蒲博之戲率常毀其家而山深林密盜賊時時竊發宋賢視事已迫季冬先出教風諭然後於城內外數處各設壯丁二人每夜巡邏至三更時必身自步行檢察遇有小鬪立加懲責其盜竊私博蹤跡驗問皆獲之故洫任甫三月民無一人犯禁者宋賢聽訟不禁人觀雖燭下案治觀者常數百人及被誣將去新令已有文符到縣民有訟事未決者爭來就決曲直謂得吾侯明斷雖受笞辱亦甘之宋賢憐其意剋日治之三月二日理事達夜至旦而止須臾新令至矣罪小者譴大者杖人人輪服而去先是將樂有平糶之法歲夏秋閒米稍貴卽勸富民糶積粟以平市買久而弊生其上富矣富聽里長條列任意低昂而限以糶米期日米多者居積如故米少者糶盡反向大戶糶之又畫定方隅某方富戶止糶某方其一方之戶多富者任分而糶易戶少富者任并而糶難勢必攤及于僅充餽粥之家賤出貴入怨聲盈耳宋賢訪知其弊盡召諸大戶切諭之使各戶將有餘米穀互相揭報不由里長條列戶有所餘以糶盡爲度米少者不強之糶而四門內外通行糶糶不限方隅民從其令各損賈發糶其始市米一升二十四錢尋減至十五錢上官善之下其法

諸州縣使皆行之而惜鄉邑終格不行也將樂每年斂稅必俟次年五月畢收蓋鄉村遠遠山嶺閒之入城既不便而輸納之際又苦管事吏胥詐索轉輾沮畏歲遲其期令無如之何但遣役人催納而已宋賢不遣一役惟飭廉幹吏數人持印信分往各鄉就徵嚴其遷延滋擾之禁吏洗手奉法民便之踴躍輸帀月而畢宋賢用法不苛但持之以信不肯二三其區處公私精力能推行之民無不感戴而饕客心害其法有飛語聞于大府遂黜去去之日民送者數千人歔歔流涕及宋賢拘囚行省民負米擔薪數百里饋遺之後以事重至其邑民扶老攜幼迎拜道旁此亦可以觀宋賢之治矣宋賢在縣所舉行之事多可紀以其爲世吏所能及故不著著其大者以聞後世云

勅授文林郎浙江德清縣知縣張君洲墓誌銘

薛寧廷

嗚呼萊峯張君之與余如唐韓宋蘇之同值磨蝎宮也今則生並世而同里也學同師也癸酉鄉試不同榜而同舉省試廷對皆同丁丑也余官廣文二年在翰林七年而君爲邑宰至暨左降學職未上余以此始君以此終皆潦倒終無所就又罔不同也同方同術而好會曰淺今年同客膠西談讌者累月而竟恤恤焉問其疾視其

含敘諾公子之請而預銘君墳樂未極而生悲尤事理之至常而至奇者也君家武功去雒南五百里末由相識也歲庚午余入關中書院肄業主講者孫西峯師而君以鄉里負笈從論文會講晨夕觀摩厯自夏首迄秋之半也成進士後君歸班迨守部需次之時而余已罷歸出入相避動如參商之不相見也君通於學而蹇于仕初授西粵之修仁再補吳興之德清中開南北奔走勞苦顛頓者行數萬里厯二十餘寒暑而兩任曾不滿一歲其坎壈視余尤甚也失意于上官不必調而調不必送都引對而客送入都皆非人之所爲而不必致憾於臧氏之子也然君乘寬閒之歲月薄宦壯遊西至蜀南極瘴鄉往來吳越荆豫以至燕趙而終老於齊也山海足以供其雕鏤悲愉足以發其精彩淬礪而盪滌之又安知非天之玉汝於成而將以大昌其詩文也文宗八家而以左史堅其骨詩溯三唐而以騷選疎其氣蓋已哀然成集而卓乎可名一家者也嗚呼富貴者天之所輕而獨若靳人以名然於兼得者愈思有以撓敗之如君之抑塞於生前而彰徹于身後人所不忌而造物且或爲之寬假也君幼而穎特長而敦敏與人無町畦而善善則長達于政事綽綽而鬱不得施澤未被於民物爲可悼惜也罷官不歸久客

齊魯閒掌嶧縣膠州書院之教十年皆以小阮德潤君爲東道主正身
率士經指授者多騰達以去而興學擇師其戴使君如文翁高朕信其
匪藉公帑以優給私親也君之疾也妻子護之謹其歿也親賓門弟子
哭之哀瓣香剪紙陳牲而酌酒者經月不絕尊其教而欽其德固不徒
門牆之髦俊也君之名曰洲字萊峯也又自號曰南林也卒之歲丁未
爲乾隆五十二年七月廿一日絳甲初周而不至生之辰者兩月也考
曰文學金甫妣楊氏繼母馮氏覃恩贈封正七品如君階也配康氏系
出對山先生以貴且賢得附見也子樹楠縣學生孫照宁將奉母扶靈
輜以歸而奠諸佳城也祖以上世次名行見于西峯先生所爲贈公墓
誌者不再詳也嗚呼余與君生平遭際十同六七則文筆雖拙而銘君
者誠莫余宜倘亦君之志也銘曰
物之用當其無宰官耶迺文儒雲錦段明月珠執經心濟史腴變齊魯
春風敷竹林款帶草紆我之來暮酒娛作元宴丹黃劬事未竟鵬坐隅
靈芝殿召而趨神超越樞載塗柳翼導經杖扶武功天社枌榆聽楚些
盍歸乎
山西交城縣知縣莊君繩祖別傳 趙懷玉

君姓莊氏諱繩祖字蜚英晚號樂閒居士世爲武進人曾祖諱京生順治戊子副榜貢生考授知縣祖諱騫贈奉直大夫直隸開州知州考諱懷圯國子監生考授縣丞贈如君官母趙氏故諱官編修諱申季女也自曾祖以上代通顯至縣丞而中落少居貧能自刻厲季父官東安令監視倉稅雞鳴至稅所暇卽讀書晚歸衙齋讀仍弗輟旣而幕客皆睡釭中油竭挹人所餘者注之如是以爲常乾隆十五年庚午以北籍生員中順天鄉試舉人屢應禮部試不第丙戌大挑奉

旨發往山西以知縣用初權平陽府同知旋授交城知縣勞心諄諄一以撫字爲事有少女般於野君集村人履勘某某者視速屑動君密召女父母問識此二人否曰是日黎明獲尸實見二人共踞高阜君曰地甚僻爲時又早不宜有人至必般人者內怯於此偵探耳嚴詰之果女不受汗被般燕某縊其妻及其弟之妻誣鄰威偏至則二婦共縊一索足離土牀二尺許土牀右設木榻君卒然問曰楊非舊在此乎然則婦由汝死何誣鄰爲燕堅不承君曰此易知耳果自縊必有承其足者非偏之使縊抽榻而何燕辭塞蓋二婦皆不謹燕故欲其死適與鄰仇遂縊而致誣也縣中稱神明縣故產羊皮及白鷹大吏皆歲徵之然白鷹

實不數見前官於羊皮多減值浮取白鷹則剋期令山民分捕民競納
賕乃免君至給羊皮民價而白臺使革取鷹之弊嘗得檄取野雞千頭
吏思貪緣爲利請仍飭民捕君弗許雇買百餘頭應焉方是時巡撫爲
鄂實公布政使爲朱公珪二公者以清節聞天下待僚屬開誠布公故
君得久任而展其志如此會大計將條君治行以上君以年逾六十非
老氏止足之義遽引疾歸去之日縣民遮道送數十里不絕道經太原
眾問車中何人僕夫以告皆曰是交城賢父母也胡爲欲歸有挽車以
送者其後交城人來官南中及里人之客山右無不嘖嘖道遺愛以爲
君去莫之能繼吾郡有鬻裘者家交城忽登堂請見時君目已盲鬻裘
者再拜曰自公歸邑父老日冀公復出今日盲其不能重莅吾土矣歛
獻而去烏庫何以得此於人人哉君天性誠樸至老不失赤子心誨人
循循弗倦甲午同考鄉試知名士多出其門歸田後唯事吟詠與同里
宣城訓導程君景傳潁州知府蔣君熊昌及君族父勇成族弟選辰族
孫宇達爲觴酒賦詩之社懷玉亦時與其閒積久倡酬頗夥君趙出於
懷玉爲大父行顧嘗以弟畜之歲時過從興特豪逸旣睡恆鬱伊不自
聊或攜酒肴就之意趣猶不減曩昔嘗爲賦二盲詩翁歌君喜而屬和

二旨者訓導程君故亦病目也君生康熙五十六年十月八日卒乾隆五十六年四月一日春秋七十有五娶吳氏繼娶董氏子二榮詰國子監生心喬女二嫁同里董襄仁和周光錦

論曰後漢元和二年詔曰安靜之吏愜愜無華日計不足月計有餘如君者殆其人歟迹其居官斷獄近知愛民近仁引退又似勇非聞道而孰能之聞君臨終以三事勅其子曰毋作行狀毋修二氏法毋增飾喪禮受親友賻而淹久不葬夫習俗移人而確然於生死之際所養蓋非一朝夕之故矣

鶴崖先生牟貞相墓誌銘

王世

壬子春余遊肥鄉縣署鶴崖與余飲酒顧余而戲曰以墓誌相託余笑之因戲索諛墓金鶴崖又戲弗予四月鶴崖赴保定感寒疾欲還閭四月五日卒於定州之清風店年三十八鶴崖諱貞相字含章姓牟棲霞人乾隆戊戌進士選肥鄉知縣一切獄訟實心辦理事關人命報到出驗吏不能得一錢監生某妾縊備多金欲餽官終日案結無由上獻調署滿城邑小而疲驛馬缺額雇買病民鶴崖坐絲毫不復擾將回肥鄉民千百赴大憲乞留又具帖別鶴崖書某村愚民拜鶴崖持其帖三寸

許以示余曰自愧無德而民有情也鶴崖既卒其客有赴保定者道出滿城之山村村中人識其馬是鶴崖平生時所騎乘者皆望馬悲涕遮道牽挽繫馬柳陰下或走汲寒泉飲之或解鞍潑洗之或持鬣尾而泣嗚呼鶴崖之愛滿城人可知也鶴崖喜讀書篤交誼其赴保定也猶手錄孔安國古文孝經呂氏讀書紀與余交一日之雅誠信莫加今鶴崖英年良有司不獲登顯仕溘然以逝余忝衰老之年執筆志其墓而實其戲謔之言其可痛也已鶴崖一子名所銘曰

鶴崖在滿城府委勘盜活平民六人茲者謁憲又爲朱氏兒求活未及允而鶴崖卒朱氏兒固不可活耶鶴崖有德而不壽豈所謂活人延年者耶嗚呼天與命不可知才之美止於斯

桐鄉邑侯呂君爾禧傳

馮浩

桐鄉浙西小邑也地窄而民稠農功蠶織終歲勤苦僅給衣食無貴物產出資貿遷四境環周七邑牙錯府畫省剖奸匪竄匿申緝羈遲爲宰者非仁義兼施寬猛相濟亦未易撫柔良靖頑梗近得武進呂侯儉以律己和以惠民公以應物勤練集事下車輿頌卽興與余雅相契余窺其心精緝密顏容清削竊隱慮之遂力勸以勉攝生毋過勞未久嬰疾

不敢廢公小愈輒增馴至於卒邑民莫不歎息屬余爲之傳遺愛之古風何可辭也君諱爾禕字皆孚號滌園姓呂氏先世自河南新安數遷常州武進其中原文獻之族裔乎高祖諱宮

國朝順治丁亥科一甲一名進士及第授修撰官至太子太保宏文院大學士授光祿大夫事具

國史江南諸志曾祖諱方洪廕員外郎贈朝議大夫祖諱廷鸛泰州儒學訓導贈中憲大夫考諱臨乾隆甲戌科進士官至汾州府同知授奉政大夫贈中憲大夫山東濟東泰武臨道母吳太宜人晉封太恭人君幼有大志厚自期勛博習經史而約取之心融神悟發爲文章措之踐履乾隆癸卯科舉京兆甲辰會試報罷用前甲午鄉試薦卷取充膳錄期滿議敘知縣分發浙江上官識其才每與論事辨疑深中竅要無揣摩依違之習累攝淳安太平義烏會稽海甯仁和州縣事杭州紹興通判同知聞其在太平也海口舊有牧士閭蓄水資灌漑廢久莫之舉君周覽形勢實闢農田水旱捐俸重建民倉其利獲洋盜虛衷研察稍有矜疑力請開釋不忍多牽逮博健吏稱去任之日民走送塞途幾不成行余嘗至海甯鄉村偶詢農夫官爲誰氏曰今姓呂真好官余是以知

君之來卽語里人相慶也君臨訟明快催科量其緩急常課外不多索
嚴治竊賊舊犯者皆遁去修葺文廟暨祀典各祠徵收銀米例給各戶
易知由單使民照額輸將絕飛洒浮加疎漏隱寄諸弊良法通行桐邑
棄弗用十六七年君立復其舊民便之癸丑六月冒暑作瘧秋嘆咭喇
貢使回途過境

欽差與封疆大吏先後雲集君偕同官分段料理纖悉無誤上游益倚
重定調仁和而君元氣耗竭遽卒矣向所竊慮不幸而中良可歎哉君
天性孝友同產五人君居其季兄爾昌癸未科進士由部員至安徽臬
使爾益廣西直隸州州判爾熾爾喆君年十六遭父喪于伯兄京邸徒
跣扶柩登潞河舟哀感路人迨發浙迎母承歡養志伯兄以前山左事
被議出關而歿君飲泣不忍以告詎料母今年屆八十存者惟四兄一
个君之靈有餘痛矣配某氏子二珏班姿秀拔年在幼學不克詳知
治行也君有輿航吟草四卷與制藝一卷藏於家君生於乾隆某年某
月某日卒於乾隆五十八年九月某日歿後蕭然無所有余嘗遇君步
出春波門二童子挾所購經史巨編隨後余謂君其仕優而學乎君曰
優何敢言冀子孫指此爲宦囊耳嗚呼君積德兼積書其子必能讀矣